

Kareta Paarü Nennoko'pü

Pairiman

Ena'

Ekamanin

Pairiman esi'pü en yawon kuru Kuri'san pe te'sen, iya'tai püra Koro'se pon so'si menpaai pe ri te'sen miri awonsi'ki apiyo' pe a'sisa' Onisimos esa' pe iyesi'pü. Puse ri si ainüsa' esi'pü tesa' piyapai, miripan uya nin si Paarü eposa' esi'pü miri pariki'si tau iyesi a'tai. Paarü uriya' Onisimos ena'pü Kuri'san pe. *Kareta Paarü Nennoko'pü Pairiman Ena'* esi Pairiman ekama'ponin ipan pe iyekonekato' pe tupoitorü pokon pe, Paarü nana'poyai'ne' ipiya', miri awonsi'ki eretanü'to' pe iya, ipi' usentu'man nisa' pe riken pen e'tane Kuri'san pe e'ni tonpa pe.

Iyawon Ekamanin

Ekamanin (1-3)

Pairiman apuripitü (4-7)

Ipan pe ekama'po Onisimos iwano' pe (8-22)

Iu'matü (23-25)

1 ¹Paarü, a'sisa' pariki'si ta' Sises Kurai iwano', miri awonsi'ki utonpa kon Temu'ti winipaino,

Utonpa kon nü'kwi miri awonsi'ki e'turawasoman tonpa, Pairiman enakan, ²A'piya, uparusi kon enakan, A'ki'pas, utonpa kon pe te'sen soisa enakan, miri awonsi'ki so'si tamurapi'sen iiwü' ta' enakan:

³Wakü nonkasa' miri awonsi'ki tausewankamai' püra e'nito' Papa, uküipünü kon miri awonsi'ki Iteperu Sises Kurai winon esi iyenakan kon pe.

**Tenki Tato' Miri Awonsi'ki
Ipürema Nito'**

⁴Tenki tawon ye' ri uri, Papa, itese' pi' e'to' pi' ipürema a'tai

uyenu yau ikupü uya pi', ⁵apüne püra iusi'nünkato' miri awonsi'ki Iteperu Sises Kurai apurito' auya miri awonsi'ki tanporo wakü ton i'nünkato' auya eta uya pi'. ⁶Ipürema apurito' auya ekamü auya yau wakü pe iku'nin pe iwesi pa, tanporo ito'ka'nükü pa tanporon wakü ton Kurai yau uiwano' kon pe na'ne'. ⁷Iusi'nünkato' uya eke pe ri pori' pe uku'sa' man miri awonsi'ki uyari'nünpasa' iya ri, apüne püra imiri, utonpa, uya wakü ton ewan to'panü'sa' pi'.

**Onisimos Iwano' Pe
Paarü Uya Ekama'po Ipan Pe**

⁸Miri pe iyesi pi', Kurai yau ri enari'müra e'tane, ayapiyo'mato'

uya ri inku'ton pi' pi', e'tane ikupu uya pen. ⁹E'tane ru'ku, ipan pe tekama'poi' usi'nankan nito' eseru poro ikupu pa anansa' uya. Uri si Paarū pe—intomi'si, miri awonsi'ki seri pe si a'sisa' Kūrai Sises iwano' pe. ¹⁰Ipan pe iyekama'po uya, umu, Onisimos^a iwano' pe, umu pe iyenasa' ru'pu i'sen yau esi koro'tau. ¹¹Pena iwa ri i'ri ku'nin pe pūra ri iyesi'pu iiwano' pe, e'tane nin si seri pe asa'yi pi' tapurisen pe nin si iyesi, imiri uya miri awonsi'ki uri uya.

¹²Ina'po uya ipiya'—uyewan pe kuru ri nin te'sen. ¹³Inenkurunpai ri nin esi upiyau, apata'pu yawon pe upika'tinin pe i'sen yau esi koro'tau waku itekare wenai. ¹⁴E'tane i'ri ri inku'pai pūra esi'pu ewai' tasa' auya pūra iye'tane, inku'pai iwe'to' kupu pa iiwano' pe imiri ta'kwarakai' pūra. ¹⁵Ipiyapai na'ki iti'pu pe iyesi aka'ne' pe ri ipiya' tenna'poto' pe inkero' pe ri—¹⁶poitoru pe pen, e'tane poitoru pe tesi entai, itonpa pe ru'kwi. Ru'kwi kuru ri upi' e'tane miri entai kuru ri ru'kwi pe kuru ipi' iyesi miri, asa'ri ri, ka'pon pe miri awonsi'ki tonpa pe Iteperu yau.

¹⁷Hisakon pe si ukupu auya yau, ereutanu'ki si uri ereutaku auya pe ri. ¹⁸Fri ri ipokena' pen ku'sa' iya yau ipi' miri pe pūra iwomasa' iya yau, e'mato' pe uya ri iku'ki. ¹⁹Uri, Paarū uya seri menuka uyemiyatu ke. Uri uya ri e'ma—enpoika uya pen ni e'tane, ukai'ya imiri ri uya ike ri uwomasa' man. ²⁰I'se e'ai', utonpa, epika'tito' inepopai e'ai' iwini Iteperu poro; uyewan ito'panu'ki Kūrai poro. ²¹Uyenu yau umaimu awiri iwesi tai'ma, iyena' imenuka uya, i'tui'ma ikupu auya unekama'po'pu entai kuru ri.

²²Seri riken pe: Uiwu' oton iwa'ku'sa' inkoneka', apune pūra e'ku'to' man ipiya' enna'po iwipurema'pu kon ei'nin pe.

²³E'pa'pūras, utonpa pe a'sisa' pe te'sen Kūrai Sises iwano' pe, miyari tato' tūuya ennoko pi' man iyena'. ²⁴Miri awonsi'ki e'turawasoma tonpa ton Ma', Aresta'kos, Temas miri awonsi'ki Ūru' ri mari nikayan.

²⁵Waku nonkasa' Iteperu Sises Kūrai uya nesii aya'kwaru kon piyau.

^a 1:10 Onisimos esi Tapurisen Ye' ta e'kwa pe.

1:10 Koro'se 4:9 1:23 Koro'se 1:7; 4:12 1:24

Inkupu'pu 12:12, 25; 13:13; 15:37-39; //19:29; 27:2; Koro'se 4:10, 14; 2 Temu'ti 4:10-11